

Minister Michelle Hooyboer-Winklaar ta habri exposicion “Kico ta kico cu arte” dialuna awor

ORANJESTAD - Dia 12 di november, na Biblioteca Nacional renoba den George Madurostraat, lo tin un exposicion cu ta duna un homenahe na diferente artista Arubiano cu a participa den transcurso di añanan den un Bienal. Diferente artista a coopera y a duna entrevista na un stagiaire cu a traha riba e exposicion aki hunto cu un comision. Editorial Charuba a realisa tambe un Magazin impresionante pe hobennan, dunando splicacion riba e nificacion di arte, artista, Bienal, formacion artistico y entrevista interesante. E Magazin yama “Kico ta kico” y cu subsidio di Prins Bernhard Cultuurfonds e prome edicion a mira luz di dia y lo wordo parti pe hobennan cu bishita e exposicion na Biblioteca Nacional. Un parti di e exposicion ta cubri tambe un seleccion di arte traha pa nos muchanan durante e asina yama “Arte Mobil”, cu a bishita varios bario den un bus di Arubus hunto cu boluntario y artista. E material uza den bus di Arte Mobil a wordo subsidia pa Boekhandel van Dorp. E Arte Mobil a wordo realisa cu exito durante vakantie

grandi formando parti di e programa vacacional di Bo Bario. E culminacion di e proyecto aki ta un exposicion cu imagen riba DVD, filma y traha pa Ryan Oduer, hunto cu Annefleur Siebinga y despues Julianne Paskel. Buffet di abogado Lincoln Gomez a yuda financia e imagen y e diseñonan cu lo ta permanente y ta sirbi como un prome homenahe na un seleccion di nos artistanan local cu a participa na un Bienal. Hoben escolar y tur interesado ta wordo cordialmente invita pa Minister Michelle Hooyboer-Winklaar pa participa na e apertura dialuna awor, dia 12 di november pa 6 or di atardi na Biblioteca Nacional renoba den George Madurostraat. □



Minister Michelle Hooyboer-Winklaar compartiendo kriet cu un hobencito



Dunando su colaboracion den e Arte Mobil



E team di Arte Mobil, hunto cu Minister Hooyboer-Winklaar y algun hobencito cu a participa



Lesamento ta dushi den Arte Mobil